

MUKANDA WAKAFUNDI

JUDE

Ambutumela Embetawudi Moyo

1 Jude, ukambi a Jesu Kristu, ndu onangu
Jakoba,

Le wane wambetama, wambulangema le
Unyashungu Shesu, ndu wambulamema dia
Jesu Kristu:

2 Ketshi, la ki, la ngandji wafuli le nyu!

***Amonyodi Weki l'Atei Anyu! "Nyuyashikike
lu Mbetawo"***
(2 Pet. 2:1-17)

3 Elangimi ami, lam'akamatetemala dia
nyufundela, dia nyokokomiya kako kame
keli la su, diaki la mi dia nyufundela, dia
nyokokomiya nti: Nyuyashikike lu mbetawo
kakawasha ekilami l'etena kame pundju.
4 Ne dia eko antu amotshi wamboto le
nyu lu usheshe, antu ako waki la akambu
awo, wakatatela nfundama edjedja dia
manyema la dianyelu ne. Vo weko akanga
a dionyo; wambuhilula ngandji ka mamba
ka Unyashungu asu uku akambu wa
kolo, wambanguna Uwandji asu wame,
Khumadiondjo Jesu Kristu.

***Akambu w'Edjedja Wambewula
Antu Dia Kolo Yawo***

5 Dimi nangaka nyuhula, kuyanga nyu
mbeyaka akambu ane nyati: Khumadiondjo
akashimbela antu uma lu kete ya Edjibitu,
ku l'okongo diku ndi akadiaki wane waki
kumbetawo. 6 Ndu andjelo waki kumamema
diulelu diawo, keli wakamo uma lu dihuli
diawo, ndi akawadji lu kanu pundju, lu
udjima edja ndu lushi la wuki w'elumbwelu.
7 Uku Sodoma la Ngomora, ndu esumba waki
lasuki lawo, wakayakimo pupu lu akambu wa
munanyi, wakukuya antu akina, wakayala uku
djimbitelu ya nsuwa lu dja ya pundju.

8 Okone ndu wane watulanyaka
alimba awo pupu lu tukanyi tawo,
watonyolaka diulelu, watotengaka akambu
wa lutumbu. 9 Keli Mikaele, andjelo a
wuki, lam'akandatshana la uhimbanyi ne
dia udu a Mose, ndi taki la dihunga dia
mbulumbuya la aui wa lotengo. Keli ndi
akati ati: Khumadiondjo akuhangweli!

10 Keli wane watotengaka akambu wahaweyi,
vo wambulanyema lu akambu weyawo vame,
uku nyama yaha la tumba. 11 Fono kayayi le
wo! Ne dia vo wakatshu lu mbuka ka Kena,
wakayakimo lu akambu wa kolo wa Balama
ne dia nkundja waho, wakashisho l'uhedia
wa Kora. 12 Vo weko uku towoko tushami
lu akambu anyu wa ngandji. Lam'alewo la
nyu, vo ndjalaka uku alami w'ekoko waha
la woma, watuyaleshaka. Vo weko uku angi
waha la ashi, watusukuyamaka la pepe; weko
uku etamba waha la elua l'eleku ka muna,
wambuwo tena pendi, wambuhikwama ndu
ediu. 13 Vo weko uku asukhu w'ashi a wuki,
watutumbaka lufulu la sonyi yawo. Vo weko
uku toto teteta l'ulungu, takawakitshiya
udjima a tshududu pundju.

14 Enoka, a lu lolonga l'esambeli uma
le Adama, akawatela akambu wahatayi ati:
Nyulungi, Khumadiondjo ambuya la ekilami
andi nunu akumi akumi, 15 dia ndjulumbuya
tshe, dia mamia atshi wa kolo tshe dia akambu
wa kolo watshawo, la dia tengo tshe yotenga
antu wa kolo. 16 Antu ane watungunangunaka,
watukiyana, watuyelaka saki yawo,
watoteketaka aui wa wulu l'enyoy awo,
watandulaka antu dia nkundja waho.

***"Nyuyalamaki lu Ngandji
ka Unyashungu"***

17 Keli nyu, elangimi ami, nyuhu
aui wakati atumami wa Khumesu Jesu
Kristu. 18 Ne dia vo wakanyutela vati:
Lu nshi y'ekumelu, asoki wayuyala,
wayokendakenda lu saki yawo ya kolo.
19 Vo weli wane watutungaka diatanyelu, vo
weli wa la kete, waha la Nyuma. 20 Keli nyu,
elangimi ami, nyuyaudia lu mbetawo kanyu
kuleki ekila; nyolombaki le Nyuma k'Ekila.
21 Nyuyalamaki lu ngandji ka Unyashungu,
nyulungamelaki ketshi ka Khumesu
Jesu Kristu, edja ndu lu lumu la pundju.
22 Nyuki wane wadja tamu l'etema ketshi.
23 Nyushimbeli amotshi, nyatundja uma lu
dja; nyuki akina ketshi la woma. Nyuhetsha
ndu dihondo dieli la awadi w'akambu wa
dimba.

Diui Di'Etshokwelo

24 One leya nyulama diaha nyu ntakana,
leya nyukitsha nyaha la vadi la ntundu ka
lutumbu landi la ongenongeno utamanya,

25 Unyashungu wame, Ushimbedi asu, ayali
la lutumbu, la wuki, la diulelu, la wulu la
ntundu k'etatelu, ndu kakiane, ndu pundju,
uma le Jesu Kristu Khumesu! Ayali osoku!